


Ang ICE-CANDY nga Pundo sa Misyon



Ni Mckenna Clarke

Gibase sa usa ka tinuod nga istorya

“Si Jesus miingon ngadto kaniya, Pakan-a ang akong mga karnero” (Juan 21:17).

Si Jared naglakaw pauli gikan sa simbahan sa mainit nga adlaw uban ni Mama ug Papa. Naghunahuna siya sa leksyon sa Primary. Tungod kay siya dili kaayo makadungog, si Jared kinahanglan nga motan-aw pag-ayo sa litrato nga gipakita sa iyang magtutudlo ug sa mga pulong nga iyang gisulat diha sa pisara.

Nianang adlaw nakakat-on sila si Jesus nagsugo sa mga disipulo nga mahimong mga misyonaryo. Si Jared naghunahuna unsa ang iyang mahimo sa pagpakigbahin sa ebanghelyo, sama sa gisugo ni Jesus. Nasayud siya nga dili pa siya makaserbisyo og misyon.

Dayon duna siyay nindot nga ideya. Tingali makasugod siya sa pagtigum og kwarta alang niini!

Sa pag-abut niya sa balay, nagdagan si Jared nga milabay ni UMBER, ang iyang kanding, ug ngadto sa sulod sa balay. Mikuha siyag dako nga sudlanan nga plastik ug mibutang og lungag sa ibabaw niini. Misulat siya “Pundo sa Misyon” diha sa kilid. Dayon miadto siya sa iyang kwarto ug mikuha sa iyang kwarta sa ilawom sa iyang higdaanan. Gitagsa-tagsa niya paghulog ang matag sensilyo. Apan ang iyang tanang sensilyo wala makatabon sa ilawom sa sudlanan. Unsaon nga makakwarta pa siya?

Naghunahuna pag-ayo si Jared. Nanambo siya sa bintana sa mahayag nga adlaw. Init kaayo sa Pilipinas.



Si Jared ug ang iyang mga higala mangaon og ice candy nga lubi hapit kada hapon human sa eskwela. “Mao kana!” naghunahuna siya. Tingali makahimo siya og ice candy ug ibaligya kini sa ubang mga tawo nga gusto nga magpabugnaw.

Nagdagan si Jared nga nangita ni Mama. “Makapakita ba ikaw nako unsaon sa paghimo og ice candy?” Nanghupaw si Jared. Migamit sila og sign language, usa ka pinulongan diin ikaw makig-istorya gamit ang imong mga kamot. Mipahiyom ug miyango si Mama.

Pagkasunod adlaw, si Jared ug si Mama miadto sa dakong merkado ug namalit sa tanang suplay. Sa dihang nakauli na sila, nagkuha si Jared og dakong panaksan ug gisagol ang tubig sa lubi, gatas nga kondensada, vanilla, ug kinagud nga lubi. Migamit si Mama ug si Jared og imbudo aron ibu-bu ang sinagol ngadto sa gagmay nga bag sa plastik. Ilang gibutang ang tanang bag nga plastik ngadto sa freezer. “Maayo!” Nanghupaw si Mama.

Ang ice candy dugay nga mogahi. Apan pagkasunod adlaw human sa eskwela, andam na kini sa katapusan! Mitungtong si Jared sa lingkuranan ug mikuha sa puti nga cooler ibabaw sa fridge. Iyang gibutangan og mga toalya

ang ilawom sa cooler ug gipahimutang ang ice candy sa ibabaw. Dili na siya makahulat sa pagbaligya niini.

Nagdagan nga migawas si Jared sa abugon nga karsada. Ang iyang mga higala nagdula sa hinimo nga tabanog ug nag-itsa sa ilang mga tsinelas sa lata aron kini matumba.

Sa kilid sa karsada, nagbutang siya og lamesa nga dunay nakasulat nga nag-ingon, “Ice Candy, 5 pesos.” Ang iyang amigo nga si Jhonell miduol ug mitudlo sa cooler. Gihatagan niya si Jared og lima ka peso nga sensilyo, ug si Jared mihatag kaniya og ice candy. Nag-aper sila.

Sa wala madugay ang mga amigo ni Jared miduol ug namalit usab sa ice candy. Paglabay sa pipila ka oras sa dihang si Mama mitawag ni Jared aron manihapon, gamay na lang ang nahibilin nga ice candy.

Gipunit ni Jared ang hapit wala nay sulod nga cooler ug mga sensilyo. Sa usa sa iyang bulsa, iyang gisulod ang mga sensilyo alang sa iyang ikapulo. Iyang gibutang ang nahibilin nga mga sensilyo ngadto sa iyang laing bulsa. Naghinam-hinam na siya nga makakita nga mapuno ang iyang alkansiya alang sa pundo sa misyon.

Didto sa balay iyang gihulog ang mga sensilyo sa ilawom sa sudlanan sa iyang pundo alang sa misyon. Dako pa kaayo og lugar! Apan si Jared mibati og nindot sa kaugalingon samtang siya naghunahuna mahitungod sa pagserbisyo og misyon sa umaabut. Nakahukom siya nga mamaligya og ice candy kada adlaw hangtud mapuno ang iyang sudlanan. Nindot kaayo ang bation nga makatigum og kwarta aron siya mahimong misyonaryo sumala sa gisugo ni Jesus kaniya. ●

Ang tagsulat nagserbisyo isip usa ka misyonaryo sa Pilipinas ug karon nagpuyo na sa Virginia, USA.

